



# **UNDANG-UNDANG MALAYSIA**

**Akta A201**

**AKTA LEMBAGA KEMAJUAN IKAN MALAYSIA  
(PINDAAN), 1973**

Tarikh Persetujuan Diraja ... 12hb Jun, 1973

Tarikh diterbitkan dalam *Warta* ... 21hb Jun, 1973

## UNDANG-UNDANG MALAYSIA

Akta A201

AKTA LEMBAGA KEMAJUAN IKAN MALAYSIA  
(PINDAAN), 1973

Suatu Akta bagi meminda Akta Lembaga Kemajuan Ikan Malaysia, 1971.

[ ~~14~~ 14<sup>th</sup> Julai 1973 ] Pu(B) 281/7

MAKA INILAH DIPERBUAT UNDANG-UNDANG oleh Duli Yang Maha Mulia Seri Paduka Baginda Yang di-Pertuan Agong dengan nasihat dan persetujuan Dewan Negara dan Dewan Rakyat yang bersidang dalam Parlimen, dan dengan kuasa daripadanya, seperti berikut:

1. Akta ini bolehlah dinamakan Akta Lembaga Kemajuan Ikan Malaysia (Pindaan), 1973 dan hendaklah mula berkuatkuasa pada tarikh yang ditetapkan oleh Menteri melalui pemberitahu dalam *Warta*.<sup>\*</sup> Tajuk ringkas dan mula berkuatkuasa.
2. Seksyen 2 Akta Lembaga Kemajuan Ikan Malaysia, 1971 (kemudian daripada ini disebut "Akta ibu") adalah dengan ini dipinda— Pindaan bagi seksyen 2. Akta 49.
  - (a) dengan memasukkan selepas sahaja takrif "Menteri" takrif "pegawai berkuasa" yang berikut—  
"pegawai berkuasa" ertinya seseorang pegawai yang diberikuasa di bawah seksyen 11;;
  - (b) dengan memasukkan selepas sahaja takrif "pegawai berkuasa" takrif "pemasaran" yang berikut—  
"pemasaran" ertinya penjualan, pembelian, pengumpulan, penyimpanan, pengangkutan, pemerosesan, pemeringkatan, pembungkusan, pengiklanan dan penggalakan; dan
  - (c) dengan memasukkan selepas sahaja takrif "Pengerusi Sementara" takrif "Timbalan Pengerusi" yang berikut—  
"Timbalan Pengerusi" ertinya Timbalan Pengerusi Lembaga;.

Pindaan  
bagi  
seksyen 3.

3. Seksyen 3 Akta ibu adalah dengan ini dipinda—

- (a) dengan menggantikan perkataan “Tanah” yang terdapat dalam perenggan-perenggan (c) dan (e) seksyen-kecil (3) dengan perkataan “Perikanan”;
- (b) dengan memasukkan dalam seksyen-kecil (3) perenggan baharu (f) yang berikut—  
 “(f) seorang wakil Bahagian Perancang Ekonomi Jabatan Perdana Menteri;”;
- (c) dengan menomborkan semula perenggan-perenggan (f) dan (g) seksyen-kecil (3) yang sedia ada itu masing-masing sebagai perenggan-perenggan (g) dan (h); dan
- (d) dengan menggantikan “(g)” yang terdapat dalam seksyen-kecil (4) dengan “(h)”.

Pindaan  
bagi  
seksyen 4.

4. Seksyen 4 Akta ibu adalah dengan ini dipinda—

- (a) dengan memasukkan dalam seksyen-kecil (1) perenggan baharu (b) yang berikut—  
 “(b) menggalakkan pemasaran yang cekap dan berkesan bagi ikan;”;
- (b) dengan menomborkan semula perenggan-perenggan (b) dan (c) seksyen-kecil (1) yang sedia ada itu masing-masing sebagai perenggan-perenggan (c) dan (d); dan
- (c) dengan menggantikan seksyen-kecil (2) dengan seksyen-kecil baharu yang berikut—  
 “(2) Lembaga adalah berkuasa bagi melakukan segala perkara yang menasabah perlu untuk atau bersampingan dengan menjalankan tugas-tugasnya di bawah seksyen-kecil (1) dan khususnya, tetapi tanpa menyentuh keluasan yang tersebut di atas—  
 (a) bagi mengadakan peraturan mengenai pemasaran ikan khususnya dengan jalan melesen penjualborong, penjualruncit, pemeroses ikan, pengimpot dan pengeksport;  
 (b) bagi menetapkan dan mengadakan peraturan mengenai pembungkusan, pemeringkatan, penimbangan dan penyimpanan ikan;  
 (c) bagi menubuhkan, mengadakan peraturan mengenai dan, jika perlu, menguruskan mengenai sesuatu kawasan, suatu pasar

jualborong ikan di mana semua transaksi jualborong ikan di kawasan itu akan dijalankan mengikut acara yang ditentukan oleh Lembaga;

- (d) bagi menetapkan cara, mengadakan peraturan mengenai, kemasukan dan acara yang hendak diikuti, di penjualan yang dijalankan di sesuatu pasar jualborong ikan, dan jika sesuatu jualan lelong diadakan di situ, bagi menetapkan cara bagaimana penjualan itu boleh dijalankan;
- (e) bagi mengadakan peraturan mengenai pemerosesan ikan;
- (f) bagi melarang, mengadakan peraturan mengenai atau mengawal pemindahan ikan;
- (g) bagi menghendaki orang-orang yang mengambil bahagian dalam pemerosesan atau pemasaran ikan supaya mendaftar dan memberi dengan apa-apa cara sebagaimana yang ditentukan oleh Lembaga apa-apa maklumat yang difikirkannya perlu;
- (h) bagi melantik ejen-ejen bagi maksud menjalankan tugas-tugasnya;
- (i) bagi mengenakan bayaran atau apa-apa caj lain yang difikirkannya patut bagi menguatkuasakan mana-mana daripada kuasa-kuasa atau tugas-tugasnya;
- (j) bagi menerima sebagai balasan bagi perkhidmatan yang diberi olehnya apa-apa kamsen atau bayaran sebagaimana yang diperseujui;
- (k) dengan kelulusan Menteri dan persetujuan Menteri Kewangan, bagi mengambil bahagian dalam ekuiti dalam apa-apa perusahaan menangkap ikan atau dalam apa-apa perusahaan yang berniagaan perbekalan dan kelengkapan menangkap ikan;
- (l) bagi menjalankan segala aktiviti yang pada pendapatnya perlu, berfaedah atau sesuai untuk atau berhubung dengan menjalankan tugas-tugasnya, termasuk pengendalian

menangkap ikan, pengangkutan, pembungkusan, pemerosesan, penjualan perbekalan, kelengkapan dan barang-barang menangkap ikan, pemeringkatan, penyimpanan, penjualan secara lelong dan lain-lain cara pemasaran amnya bagi ikan dan bagi menguruskan aktiviti-aktiviti itu;

(m) bagi menjalankan segala tugas dan kuasa dan melaksanakan segala kewajipan yang mungkin diletakhak atau diwakilkan kepadanya di bawah atau menurut mana-mana undang-undang bertulis yang lain.”.

Pindaan  
bagi  
seksyen 5

5. Seksyen 5 Akta ibu adalah dengan ini dipinda—

(a) dengan memotong perkataan-perkataan “menjadi Pengurus Besar yang akan” yang terdapat dalam seksyen-kecil (1);

(b) dengan memotong perkataan-perkataan “Pengurus Besar,” yang terdapat dalam hasyiahnya; dan

(c) dengan menggantikan seksyen-kecil (4), dengan seksyen-kecil baharu (4) yang berikut—

“(4) Timbalan Pengerusi hendaklah mempunyai kuasa-kuasa seorang pegawai berkuasa di bawah Akta ini.”.

Bahagian-  
bahagian  
baharu III,  
IV dan V.

6. Maka hendaklah dipotong Bahagian III dalam Akta ibu dan digantikan dengan Bahagian-bahagian baharu III, IV dan V sebagaimana dinyatakan dalam Jadual kepada Akta ini.

Pindaan  
bagi  
Akta 49/65,  
pemansuhan  
Peraturan-  
peraturan  
Jemaah  
Pemasaran  
Ikan, 1971  
dan  
peruntukan-  
peruntukan  
peralihan.  
P.U. (A)  
113/71.

7. (1) Seksyen 24 Akta Lembaga Pemasaran Pertanian Persekutuan, 1965 (kemudian daripada ini disebut “Akta 1965”) adalah dengan ini dipinda dengan memotong perkataan-perkataan “and includes fish and fishery products” yang terdapat dalam takrif “agricultural produce”; dan dengan itu Peraturan-peraturan Jemaah Pemasaran Ikan, 1971 (kemudian daripada ini disebut “Peraturan-peraturan itu”) hendaklah berhenti daripada berkuatkuasa.

P.U. (B)  
191/70.

(2) Walau apa pun peruntukan-peruntukan seksyen-kecil (1), Rancangan Pemasaran Ikan yang ditetapkan di bawah seksyen 5 Akta 1965 hendaklah berkuasa dan berkesan seferusnya sehingga ditarikbalik atau dengan cara lain ditamatkan dengan kaedah yang dibuat di bawah seksyen

## LEMBAGA KEMAJUAN IKAN MALAYSIA (PINDAAN)

7

23 Akta ibu; dan dalam masa rancangan pemasaran itu berjalan seterusnya—

(a) Lembaga hendaklah, walau apa pun dalam rancangan pemasaran itu, mempunyai semua kuasa Jemaah Pemasaran Ikan yang ditubuhkan di bawah Peraturan-peraturan itu bagi maksud rancangan pemasaran itu (kemudian daripada ini disebut "Jemaah") termasuk kuasa-kuasa yang diperuntukkan di bawah peraturan 4 Peraturan-peraturan itu; dan

(b) Tribunal Pemasaran Pertanian yang ditubuhkan di bawah seksyen 16 dalam Akta 1965 hendaklah menjalankan kuasa-kuasa di bawah seksyen itu berhubung dengan rayuan-rayuan berkenaan dengan pengeluaran, pembaharuan atau penarik-balikan sesuatu lesen di bawah Rancangan atau berkenaan dengan apa-apa syarat yang dikenakan ke atas lesen itu; dan peruntukan-peruntukan seksyen 15 Akta 1965 hendaklah dipakai bagi rayuan-rayuan itu.

8. (1) Tertakluk kepada peruntukan-peruntukan Akta ibu, semua harta alih dan harta takalih dan aset-aset yang sebelum sahaja mula berkuatkuasanya Akta ini diletakhak kepada Jemaah atau kepada seseorang bagi pihak Jemaah hendaklah pada hari itu diletakhak kepada Lembaga.

Pemindahan  
harta, hak  
dan tang-  
gungan  
Jemaah.

(2) Segala kuasa, hak, keistimewaan, kewajipan atau tanggungan yang sebelum sahaja hari itu adalah kepunyaan Jemaah hendaklah mulai dari hari itu berpindah kepada Lembaga.

(3) Segala suratikatan, bon, perjanjian, kontrek, surat-cara dan peraturan kerja yang wujud sebelum sahaja hari itu dan yang berkenaan dengan mana-mana daripada harta, hak dan tanggungan yang diletakhak atau berpindah di bawah seksyen-seksyen-kecil di atas hendaklah berkuatkuasa dan berkesan sepenuhnya terhadap atau untuk faedah Lembaga dan boleh dikuatkuasakan dengan sepenuh dan berkesan seolah-olah Lembaga telah dinamakan di dalamnya atau menjadi pihak kepadanya sebagai ganti Jemaah atau seseorang yang bertindak bagi pihak Jemaah.

9. (1) Tiada apa-apa pindaan atau pemansuhan di bawah seksyen 7 dan juga tiada apa-apa yang terkandung dalam Akta ibu boleh menyentuh tanggungan seseorang untuk didakwa atau dihukum bagi kesalahan-kesalahan yang dilakukan di bawah Peraturan-peraturan itu sebelum mula

Penerusan  
pembicaraan  
pembicaraan  
jenayah  
dan sivil.

berkuatkuasanya Akta ini, atau apa-apa pembicaraan yang dibawa sebelum tarikh itu berkenaan dengan kesalahan itu.

(2) Sesuatu pembicaraan, samada sivil atau jenayah, atau alasan tindakan yang belum selesai atau yang wujud sebelum sahaja hari itu oleh atau terhadap Jemaah atau seseorang yang bertindak bagi pihak Jemaah boleh diteruskan atau dimulakan oleh atau terhadap Jemaah sebagaimana ianya mungkin telah diteruskan atau dimulakan oleh atau terhadap Lembaga atau seseorang itu jika Akta ini tidak di-kanunkan.

(3) Sesuatu rayuan yang dibawa atau sesuatu keizinan untuk merayu yang dipohon pada atau selepas hari itu terhadap sesuatu keputusan yang diberi sebelum hari itu dalam sesuatu pembicaraan undang-undang dalam mana Jemaah adalah suatu pihak boleh dibawa oleh atau terhadap Lembaga.

Pindah-  
milik  
Kumpulan-  
wang.

**10.** Tertakluk kepada peruntukan-peruntukan Akta ibu, segala wang yang ada di dalam, atau yang kena dibayar kepada, Kumpulanwang Jemaah hendaklah, apabila mula berkuatkuasanya Akta ini, dipindahmilik kepada Kumpulanwang yang ditubuhkan di bawah seksyen 6 Akta ibu.

Penerusan  
pegawai-  
pegawai dan  
penjawat-  
penjawat.

**11.** (1) Tiap-tiap orang yang sebelum sahaja mula berkuatkuasanya Akta ini telah diambilkerja sebagai seseorang pegawai atau penjawat Jemaah hendaklah pada hari itu diambilkerja sebagai seseorang pegawai atau penjawat, mengikut mana-mana yang berkenaan, bagi Lembaga atas had-had dan syarat-syarat perkhidmatan sama seperti yang terdapat sebelum sahaja hari itu.

(2) Seksyen ini tidak boleh dipakai bagi pegawai-pegawai dan penjawat-penjawat Lembaga. Pemasaran Pertanian Persekutuan yang pada hari itu telah dipinjamkan untuk berkhidmat dengan Jemaah.

Mencegah  
anomali.

**12.** (1) Jika sesuatu kesulitan timbul berhubung dengan peruntukan-peruntukan peralihan yang terkandung dalam seksyen-seksyen yang tersebut di atas, Menteri boleh dengan perintah, tertakluk kepada seksyen-kecil (2), membuat apa-apa ubahsuaian di dalamnya sebagaimana yang pada pendapatnya perlu untuk mencegah anomali.

(2) Menteri tidak boleh menjalankan kuasa-kuasa yang diberi oleh seksyen-kecil (1) selepas tamatnya dua tahun dari mula berkuatkuasanya Akta ini.



JADUAL  
(Seksyen 6)

BAHAGIAN III

KUASA-KUASA BERHUBUNG DENGAN  
PENGUATKUASAAN

11. (1) Menteri boleh memberikuasa secara bertulis kepada mana-mana pegawai awam atau pegawai Lembaga untuk menjalankan kuasa-kuasa di bawah Bahagian ini.

Memberi-kuasa kepada pegawai untuk menjalankan kuasa-kuasa di bawah Bahagian ini.

(2) Pada menjalankan mana-mana daripada kuasa-kuasa di bawah Bahagian ini pegawai itu hendaklah, apabila diminta, mengemukakan kepada orang yang terhadapnya tindakan diambil olehnya di bawah Akta ini atau di bawah mana-mana kaedah yang dibuat di bawahnya, suratkuasa yang dikeluarkan kepadanya oleh Menteri.

12. Jika mana-mana pegawai berkuasa atau pegawai polis ada alasan-alasan yang menasabah bagi mempercayai bahawa sesuatu kesalahan telah dilakukan di bawah Akta ini atau di bawah mana-mana kaedah yang dibuat di bawahnya, maka pegawai itu boleh memasuki mana-mana premis yang dipunyai atau diduduki oleh mana-mana orang dan boleh menjalankan apa-apa penyelidikan dan pemeriksaan (termasuklah penyelidikan dan pemeriksaan buku-buku) yang difikirkannya perlu dan boleh mengambil dan menahan apa-apa buku, suratan atau benda lain yang terjumpa dalam premis itu yang boleh memberi keterangan tentang sesuatu kesalahan di bawah Akta ini atau di bawah mana-mana kaedah yang dibuat di bawahnya.

Kuasa untuk memasuki premis.

13. (1) Mana-mana pegawai berkuasa atau pegawai polis boleh—

(a) menangkap tanpa waran mana-mana orang yang ia ada sebab bagi mempercayai telah melakukan suatu kesalahan di bawah Akta ini atau di bawah mana-mana kaedah yang dibuat di bawahnya, jika orang itu enggan memberi nama dan alamatnya atau jika memberi suatu alamat di luar Malaysia atau jika ada alasan-alasan yang menasabah bagi mempercayai bahawa orang itu

Kuasa bagi menangkap, mengambil, menyiasat dan mendakwa.

telah memberi suatu nama atau alamat palsu atau bahawa ia mungkin akan melarikan diri:

Dengan syarat bahawa apabila seseorang telah ditangkap seperti tersebut di atas, tindakan hendaklah kemudiannya diambil terhadapnya mengikut sebagaimana yang diperuntukkan oleh undang-undang berhubung dengan acara jenayah yang berkuatkuasa pada masa itu; dan

- (b) mengambil apa-apa jua benda yang difikirkannya perlu diambil berhubung dengan keterangan yang perlu bagi membuktikan berlakunya sesuatu kesalahan itu.

(2) Mana-mana pegawai berkuasa dan mana-mana pegawai polis yang berpangkat tidak rendah daripada Inspekter boleh, berhubung dengan apa-apa penyiasatan berkenaan dengan apa-apa kesalahan di bawah Akta ini atau di bawah mana-mana kaedah yang dibuat di bawahnya tanpa perintah Pendakwa Raya, menjalankan kuasa-kuasa khas berhubung dengan penyiasatan polis, yang diberi oleh undang-undang berhubung dengan acara jenayah dalam apa-apa kesalahan yang boleh ditangkap.

(3) Apa-apa pendakwaan berkenaan dengan sesuatu kesalahan di bawah Akta ini atau di bawah mana-mana kaedah yang dibuat di bawahnya boleh dijalankan oleh seseorang pegawai berkuasa.

Kuasa  
untuk mem-  
berhentikan  
dan  
memeriksa.

14. (1) Jika seseorang pegawai berkuasa atau pegawai polis ada syak yang menasabah bahawa sesuatu kenderaan sedang membawa apa-apa ikan bersalahan dengan mana-mana peruntukan Akta ini atau mana-mana kaedah yang dibuat di bawahnya, maka adalah sah di sisi undang-undang bagi pegawai itu memberhentikan dan memeriksa kenderaan itu bagi maksud menentukan samada apa-apa ikan ada terkandung di dalamnya atau sedang dipindah atau diangkut bersalahan dengan peruntukan-peruntukan Akta ini atau mana-mana kaedah yang dibuat di bawahnya dan orang yang mengawal atau menjaga kenderaan itu hendaklah, jika dikehendaki untuk berbuat demikian oleh pegawai itu, memberhentikan kenderaan itu dan membenarkan pegawai itu memeriksanya.

(2) Orang yang mengawal atau menjaga mana-mana kenderaan yang diperiksa di bawah peruntukan seksyen ini hendaklah, apabila diminta oleh pegawai berkuasa atau pegawai polis itu, membuka semua bahagian kenderaan itu untuk diperiksa oleh pegawai itu dan mengambil segala langkah yang perlu untuk membolehkan pegawai itu menjalankan apa-apa pemeriksaan yang difikirkannya perlu.

15. (1) Jika mana-mana pegawai berkuasa atau pegawai polis ada sebab bagi mempercayai bahawa seseorang sedang melakukan sesuatu kesalahan di bawah Akta ini atau di bawah mana-mana kaedah yang dibuat di bawahnya maka ia boleh mengambil milik dengan apa-apa cara yang difikirkannya patut, apa-apa ikan yang berkenaan dengannya ia ada sebab bagi mempercayai sesuatu kesalahan itu telah dilakukan atau mana-mana kereta, vesal atau lain-lain barang yang telah digunakan bagi melakukan sesuatu kesalahan itu atau yang ia ada sebab bagi mempercayai dicadang hendak digunakan bagi melakukan kesalahan itu.

Kuasa  
untuk  
mengambil  
milik.

(2) Jika apa-apa ikan telah diambil milik di bawah peruntukan-peruntukan seksyen ini, maka Timbalan Pengerusi—

(a) jika ia ada sebab bagi mempercayai bahawa suatu kesalahan di bawah Akta ini atau di bawah mana-mana kaedah yang dibuat di bawahnya telah dilakukan dan pembicaraan jenayah telah dimulakan terhadap mana-mana orang berkenaan dengan kesalahan itu, boleh memohon kepada Mejisteret untuk suatu perintah supaya ikan itu dijual atau dilupuskan dan jika ikan itu diperintahkan supaya dijual, hasil penjualan itu hendaklah disimpan sehingga pembicaraan jenayah itu selesai; atau

(b) dalam apa-apa hal yang lain, boleh memulihkan pemilikan kepada pemunya.

(3) Jika mana-mana kereta, vesal atau lain-lain barang telah diambil milik di bawah peruntukan-peruntukan seksyen ini, maka Timbalan Pengerusi—

(a) jika ia ada sebab bagi mempercayai bahawa suatu kesalahan di bawah Akta ini atau di bawah mana-mana kaedah yang dibuat di bawahnya

telah dilakukan, boleh, menurut budibicaranya, memulangkan bagi sementara kereta, vesal atau lain-lain barang itu kepada pemunya apabila jaminan diberi dengan memuaskan hatinya bahawa kereta, vesal atau lain-lain barang itu akan diserahkan balik kepadanya apabila diminta; atau

(b) dalam apa-apa hal yang lain, boleh memulihkan pemilikan kepada pemunya.

(4) (a) Timbalan Pengerusi boleh secara bertulis mewakili kuasa-kuasanya di bawah seksyen-seksyen-kecil (2) dan (3) kepada mana-mana pegawai berkuasa dan boleh pada bila-bila masa menarik balik mana-mana perwakilan itu.

(b) Walau apa pun perwakilan itu, Timbalan Pengerusi boleh, jika difikirkannya patut, menjalankan kuasa-kuasa yang diwakilkannya sedemikian.

#### BAHAGIAN IV

##### KESALAHAN-KESALAHAN, PENALTI-PENALTI DAN PEMBICARAAN-PEMBICARAAN

Kesalahan menghalang.

16. Seseorang yang menghalang atau menghindar Timbalan Pengerusi, mana-mana pegawai berkuasa atau pegawai polis pada menjalankan dengan sah mana-mana daripada kuasa-kuasanya di bawah Akta ini atau di bawah mana-mana kaedah yang dibuat di bawahnya adalah melakukan suatu kesalahan di bawah Akta ini.

Penalti am.

17. (1) Seseorang, lain daripada sesuatu pertubuhan perbadanan, tetapi termasuk seseorang pengarah atau pegawai sesuatu pertubuhan perbadanan, yang melakukan sesuatu kesalahan di bawah, atau yang tidak mematuhi, mana-mana daripada peruntukan-peruntukan Akta ini atau mana-mana kaedah yang dibuat di bawahnya yang penalti baginya tiada diperuntukkan dengan nyatanya boleh, apabila disabitkan, dikenakan penjara selama tempoh tidak lebih daripada dua tahun atau denda tidak lebih daripada lima belas ribu ringgit atau penjara dan denda itu kedua-duanya dan, bagi kesalahan kali kedua atau kali kemudian, penjara selama tempoh tidak lebih daripada lima tahun atau denda tidak lebih daripada dua puluh lima ribu ringgit atau penjara dan denda itu kedua-duanya.

(2) Sesuatu pertubuhan perbadanan yang melakukan sesuatu kesalahan di bawah, atau yang tidak mematuhi, mana-mana daripada peruntukan-peruntukan Akta ini atau mana-mana kaedah yang dibuat di bawahnya boleh apabila disabitkan dikenakan denda tidak lebih daripada dua puluh lima ribu ringgit dan, bagi kesalahan kali kedua atau kali kemudian, denda tidak lebih daripada lima puluh ribu ringgit.

(3) Jika seseorang yang dipertuduhkan atas suatu kesalahan di bawah mana-mana daripada peruntukan-peruntukan Akta ini atau mana-mana kaedah yang dibuat di bawahnya adalah suatu pertubuhan perbadanan, maka tiap-tiap orang yang pada masa kesalahan itu dilakukan adalah seorang pengarah atau pegawai bagi pertubuhan perbadanan itu boleh dipertuduhkan bersesama dalam pembicaraan itu juga dengan pertubuhan perbadanan itu dan jika pertubuhan perbadanan itu disabitkan kesalahan yang dipertuduhkan itu, tiap-tiap pengarah atau pegawai itu hendaklah disifatkan sebagai bersalah atas kesalahan itu melainkan jika ia membuktikan bahawa kesalahan itu telah dilakukan tanpa pengetahuannya atau bahawa ia telah mengambil langkah-langkah pengawasan yang menasabah untuk mengelakkan kesalahan itu daripada dilakukan.

(4) Seseorang yang tetap boleh dikenakan apa-apa penalti di bawah mana-mana daripada peruntukan-peruntukan Akta ini atau mana-mana kaedah yang dibuat di bawahnya bagi apa-apa perkara yang dilaku atau ditinggalkan jika perkara itu telah dilaku atau ditinggalkan olehnya sendiri, boleh dikenakan penalti yang sama jika perkara itu telah dilaku atau ditinggalkan oleh kongsi, ejen atau penjawatnya, melainkan jika ia membuktikan bahawa ia telah mengambil langkah-langkah pengawasan yang menasabah untuk mengelakkan perkara itu daripada dilaku atau ditinggalkan.

18. (1) Dalam apa-apa pendakwaan berkenaan dengan sesuatu kesalahan di bawah Akta ini atau di bawah mana-mana kaedah yang dibuat di bawahnya atas suatu pertuduhan melakukan sesuatu perbuatan yang menyalahi undang-undang melainkan jika orang yang melakukan perbuatan itu berhak melakukan sedemikian oleh sebab ianya adalah pemegang sesuatu lesen, permit atau kebenaran, keizinan, kuasa atau pengecualian

Beban  
membukti.

bertulis yang menghakkannya melakukan perbuatan itu, maka memadai bagi pihak pendakwa mengata dan membuktikan bahawa orang itu telah melakukan perbuatan itu dan bebanan hendaklah kemudiannya terletak ke atas orang yang dituduh itu bagi membuktikan yang ia telah berhak melakukan perbuatan itu.

(2) Dalam apa-apa pendakwaan berkenaan dengan sesuatu kesalahan di bawah Akta ini atau di bawah mana-mana kaedah yang dibuat di bawahnya, pengemukakan oleh orang yang menjalankan pendakwaan itu akan sesuatu invois asal atau sesuatu invois pendua yang telah dibuktikan sebagai telah didapati dalam milik penjual hendaklah, jika orang yang menjalankan pendakwaan itu meminta sedemikian, diterima sebagai keterangan *prima facie* mengenai sesuatu penjualan oleh penjual itu dan mengenai semua kenyataan yang dinyatakan dalam invois asal atau invois pendua itu dan walau apa pun peruntukan mana-mana undang-undang yang berlawanan yang pada masa itu berkuatkuasa, beban bagi membuktikan bahawa penjualan itu telah tidak berlaku atau bahawa sesuatu kenyataan yang dinyatakan dalam invois asal atau invois pendua itu bukanlah seperti apa yang dinyatakan itu hendaklah terletak ke atas orang yang dituduh itu.

Kuasa  
Mahkamah  
untuk  
merampas.

19. Jika seseorang disabitkan sesuatu kesalahan di bawah Akta ini atau di bawah mana-mana kaedah yang dibuat di bawahnya, Mahkamah boleh memerintahkan supaya dirampas—

- (a) kesemua atau sebahagian daripada hasil penjualan apa-apa ikan yang telah dijual di bawah seksyen 15, yang berkenaan dengannya kesalahan itu telah dilakukan dan yang telah diambil oleh, atau dengan cara lain telah sampai ke dalam milik Timbalan Pengerusi atau mana-mana pegawai berkuasa atau pegawai polis;
- (b) mana-mana kereta, vesal atau lain-lain barang harta kepunyaan orang yang dituduh itu yang digunakan olehnya untuk melakukan kesalahan itu atau yang telah dicadang hendak digunakan bagi melakukan sesuatu kesalahan di bawah Akta ini atau di bawah mana-mana kaedah yang dibuat di bawahnya.

20. Walau apa pun yang berlawanan dalam mana-mana undang-undang bertulis yang lain, sesuatu Mahkamah Sesyen di Malaysia Barat dan Mahkamah Mejistret Klas Pertama di Malaysia Timur, adalah mempunyai bidangkuasa untuk membicarakan apa-apa kesalahan di bawah Akta ini atau di bawah mana-mana kaedah yang dibuat di bawahnya, dan untuk mengaward hukuman penuh bagi mana-mana kesalahan itu.

Bidang-kuasa.

21. Tiada apa-apa pembicaraan boleh dimulakan di bawah Akta ini terhadap mana-mana orang yang diberikuasa dengan sempurna bagi maksud itu oleh Timbalan Pengerusi, jika orang itu telah dengan diketahuinya melakukan atau meninggalkan daripada melakukan sesuatu perbuatan yang tetap menjadi suatu kesalahan jika tidak kerana peruntukan seksyen ini, dengan syarat bahawa orang itu telah melakukan atau telah meninggal daripada melakukan perbuatan itu dengan tujuan hendak mendapatkan keterangan bagi maksud hendak mendakwa penjual itu atas sesuatu kesalahan di bawah Akta ini atau di bawah mana-mana kaedah yang dibuat di bawahnya.

Perkecualian.

## BAHAGIAN V

### • AM

22. Jika menurut peruntukan-peruntukan Akta ini atau mana-mana kaedah yang dibuat di bawahnya sesuatu lesen adalah dikehendaki untuk pemerosesan atau pemasaran apa-apa ikan, mana-mana orang yang terkilan dengan keengganan Lembaga mengeluarkan atau membaharui atau dengan penarikbalikan oleh Lembaga, lesen itu, atau dengan pengenaan syarat-syarat ke atas lesen itu, boleh dalam tempoh tiga puluh hari dari keputusan itu diberitahu kepadanya secara bertulis merayu kepada Menteri dan keputusan Menteri itu adalah muktamad.

Rayuan terhadap keputusan Lembaga.

23. Lembaga boleh dengan kelulusan Menteri membuat kaedah-kaedah secara am bagi menjalankan peruntukan-peruntukan Akta ini, dan khususnya tetapi tanpa menyetujui kelulusan perkara yang tersebut di atas, kaedah-kaedah itu boleh—

Kaedah-kaedah.

- (a) mengadakan peraturan mengenai pengawalan dan pengurusan apa-apa bantuan (samada kewangan atau selainnya) yang boleh diberi kepada enterpris-enterpris menangkap ikan;

- (b) menetapkan apa-apa bayaran atau caj yang perlu bagi maksud Akta ini;
- (c) dengan kelulusan Menteri Kewangan membuat peruntukan untuk menubuh dan menguruskan suatu kumpulanwang simpanan caruman bagi pegawai-pegawai dan penjawat-penjawat Lembaga, atau untuk membayar pencen, elaun atau ganjaran kepada pegawai-pegawai dan penjawat-penjawat yang tersebut itu apabila bersara atau dengan cara lain berhenti memegang jawatan sebagai pegawai-pegawai dan penjawat-penjawat itu;
- (d) menetapkan apa-apa perkara yang dikehendaki ditetapkan oleh Akta ini; dan
- (e) menetapkan bahawa apa-apa perbuatan atau ketinggalan bersalahan dengan peruntukan-peruntukan mana-mana kaedah-kaedah itu hendaklah menjadi suatu kesalahan.

Kerahsiaan  
dan penalti.

**24.** (1) Kecuali bagi maksud-maksud Akta ini atau bagi maksud sesuatu pembicaraan jenayah di bawah Akta ini, tiada seseorang ahli, pegawai atau penjawat Lembaga boleh menzahirkan apa-apa maklumat berhubung dengan mana-mana satu perniagaan yang telah didapati olehnya semasa menjalankan kewajipan-kewajipannya dan yang tidak disiarkan menurut Akta ini.

(2) Seseorang yang dengan diketahuinya melanggar peruntukan-peruntukan seksyen-kecil (1) adalah melakukan suatu kesalahan dan boleh apabila disabitkan dikenakan denda tidak lebih daripada lima ribu ringgit atau penjara selama tempoh tidak lebih daripada satu tahun.

Penjawat  
awam.  
N.M.B.  
Bab 45.  
Sabah 3/59.  
Sarawak  
Bab 57.

**25.** Semua ahli, pegawai dan penjawat Lembaga dan mana-mana pegawai berkuasa hendaklah disifatkan sebagai penjawat-penjawat awam dalam erti Kanun Kesiksaan yang berkenaan.



26. (1) Tiada apa-apa tindakan, guaman, pendakwaan atau lain-lain pembicaraan boleh dibawa atau dimulakan terhadap diri seseorang ahli Lembaga atau terhadap diri pegawai atau penjawat yang dilantik oleh Lembaga berkenaan dengan apa-apa perbuatan yang dilakukan atau pernyataan yang dibuat *bona fide* dalam menurut atau melaksanakan atau pelaksanaan yang dicadangkan bagi Akta ini.

Perlin-  
dungan  
terhadap  
pem-  
bicaraan  
undang-  
undang.

(2) Jika seseorang dikecualikan daripada tanggungan semata-mata kerana peruntukan seksyen ini, Lembaga boleh bertanggung setakat mana ia boleh bertanggung jika orang itu adalah seorang penjawat atau ejen Lembaga.”.

